



Magnum Bullarium Romanum, Seu Ejusdem Continuatio

Quæ Supplementi loco sit, tum huicce, tum aliis quæ præcesserunt
Editionibus, Romanæ, & Lugdunensi ...

Constitutiones Variorum Pontificum in præcedentibus Editionibus
desideratas, summoque studio hinc inde conquisitas complectens

Luxemburgi, 1741

8. Inter felicitates &c. Erectio Universitatis Nannetensis anno 1463.

[urn:nbn:de:hbz:466:1-74452](https://nbn-resolving.org/urn:nbn:de:hbz:466:1-74452)

ANN O
1463.

gnomina præsentibus habere volumus pro ext-
pressis ultra pœnas jam ditas, omnibus, &
singulis eorum beneficiis ecclesiasticis cum cu-
ra vel sine cura, Canonicatibus, & Præben-
dis, dignitatibus, Personatibus, officiis, seu
administrationibus, absque alia declaratione,
quacunq; privatos esse volumus, atque pri-
vamus per præsentem, eaque sic vacare decer-
nimus. Per præmissa tamen, tam carissimo in
Christo Filio nostro Friderico Romanorum Im-
peratori, quam dilecto filio nobili viro Al-
berto Duci ejus Germano ex eadem domo
Austriæ oriundis, & etiam omnibus juribus,
nec non etiam doti, aut donationi propter nup-
tias dilectæ in Christo Filia Eleonora de Scocia
dicti Sigismundi conthoralis, quæ, ut veridicè
accepimus, præfatis facinoribus, & nefandis ne-
quaquam consentit, nolumus in aliquo præju-
dicare, sed ea sua bona sibi quoad vixerit, illæsa
remanere.

Nulli ergo omnino hominum liceat hanc pa-
ginam nostræ reservationis, innodationis, ana-
thematis, bannimenti, constitutionis &c. infrin-
gere vel ei ausu temerario contravenire: Si quis
autem hoc attentare præsumpsit, indignatio-
nem omnipotentis Dei, & beatorum Petri, &
Pauli Apostolorum ejus se noverit incursum.

Datum Senis anno Incarnationis Dominicæ,
1460. sexto Idus Augusti, Pontificatus nostri
anno secundo.

VIII.

Ex histor.
univers. Pa-
risiens. Bulæ
Tom. 5. pag.
661.

Erectio Universitatis Nannetensis anno 1463.

PIUS EPISCOPUS,

*Servus Servorum Dei, ad perpetuam rei me-
moriæ.*

Inter felicitates quas mortalis homo in hac
labili vita ex dono Dei nancisci potest, ea
non in ultimis computari meretur, quod per
assiduum studium adipisci valeat scientiæ mar-
garitam, quæ benè, beateque vivendi viam
præbet, & peritum, ab imperito sua preciosi-
tate longè faciat excellere, & ad mundi ar-
cana cognoscenda dilucidè inducit, suffragatur
indoctis, & in infimo loco natos inducit in
sublime. Et propterea Sedes Apostolica rerum
spiritualium, & etiam temporalium provida
ministratrix, cujusvis laudabilis exercitii perpe-
tua, & constans adiutrix, ut eo facilius ho-
mines ad tam excelsam humanæ conditionis fas-
tigium acquirendum, & acquisitum in alios
refundendum semper cum augmento quæsti
facilius inducantur. Cum aliarum rerum dis-
tributio massam minuat, scientiæ verò commu-
nicatio quantum in plures diffunditur, tantò
semper augeatur & crescat, illos hortatur, eis
loca præparat, & opportuna commoditatis
auxilia impartitur, Catholicorum Principum
notis favorabiliter annuendo. Cum itaque,
sicut accepimus, dilectus filius nobilis vir
Franciscus Britonum Dux sui Ducatus Britan-
niæ, in quo novem Ecclesiæ Cathedralis, Ci-
vitates insignes, & totidem dioceses ab invi-
cem distinctæ, notabilia monasteria, & Bene-
ficia Ecclesiastica, sæcularia, & regularia, co-
piosusque, tam Ecclesiasticorum, quam sæcu-
larium, nobilium, & ignobilium Populi nu-
merus consistunt, ac ejusdem populi statum
prosperari cupiens, ac cognoscens, quod si
in aliqua Civitate earumdem studium vigeret
Litterarum generale, quam plures ejusdem
Populi quorum aliqui studiorum litterarum
per eos inceptorum desertores efficiuntur, a-

lii verò, qui ipsi studio operam dare cogi-
tant, ab eo retrahuntur, perfectam acquir-
rent scientiæ margaritam, non mediocriter
ipsi statui profuturam. Cupit pro Republica,
ac Incolarum ejusdem Ducatus, aliorumque
ad ipsam margaritam anhelantium utilitatem
in una Civitate ipsis uberrima, videlicet
Nannetensi, ad quam flumen Ligeris spatio
ducentorum milliarium & ultra navigabilis à
partibus Franciæ, & deinde ad portum maris
ipsi Civitati Nannetensi multum accommodum
tendit, & per quod omnia vitæ humanæ
necessaria, & ad eandem Civitatem navali,
& carbarum usu vehi possunt, & in qua
aëris temperies viget, victualium ubertas, cæ-
terarumque rerum ad usum vitæ humanæ hu-
jusmodi pertinentium copiam reperitur, plu-
rimùm desiderat fieri, & ordinari per eandem
sedem studium generale in qualibet licita fa-
cultate.

Nos igitur præmissa, & etiam eximiam ip-
sius Ducis, & prædecessorum Britannia Prin-
cipum fidei devotionem sinceritatem quam ad
nos, & Romanam Ecclesiam, cui semper ple-
narè, ac constanter obedivisse sine varietate
comprobantur, attentè considerantes, ferventi
desiderio ducimur, quod Ducatus prædic-
tu scientiarum ornatur muneribus, ita ut vi-
ros producat consilii maturitate conspicuos,
virtutum redimitos ornatibus, & diversarum
facultatum dogmatibus conditos, sique ibi
fons irrigans, de cujus plenitudine hauriant
universi Christi fideles undique illic affluentes
& litterarum documentis insistentes. Horum
igitur consideratione inducti ad laudem di-
vini nominis, & orthodoxæ fidei propaga-
tionem, ipsius Reipublicæ, & partium ea-
rumdem commodum, atque profectum

Auctoritate Apostolica concedimus, statui-
mus, & ordinamus, quod in dicta Civitate
Nannetensi, de cætero sit, & perpetuis futu-
ris temporibus vigeat studium generale, &
Universitas existat studii generalis tam in The-
ologia, quam Jure Canonico, Civili, & Medicina,
quam quavis alia licita facultate, in quibus sicut
in Parisiensi, Bononiensi, Avenionensi, Senensi, &
Andegavensi generalibus studiis, Ecclesiastici
quicumque, & qualicumque Beneficia Eccle-
siastica obtinentes, & Laiçi Magistri, & Do-
ctores doceant, & studere volentes undecum-
que fuerint studeant, & proficere, ac benemeriti
Baccalariatus, Licentiæ Doctoratus, & Magiste-
rii, & quoscumque alios gradus recipere illis
sic bene meritis, impendi valeant, atque possint.

Volentes, & ordinantes, quod Venerabilis
Fater Guillelmus modernus, & pro tempore
existens Episcopus Nannetensis sit studii, &
Universitatis hujusmodi Cancellarius, qui aut
per eum, seu sede Nannetensi vacante per Ca-
pitulum quoad hoc deputatus Vicarius in quali-
bet dictarum facultatum commendabilis vitæ
Scholaribus, quos ad hoc Recter studiis, Re-
gentes Magistri, sive Doctores Facultatis, in
qua graduari singuli postulabunt, seu major pars
eorum idoneos reputaverint, Baccalariatus, &
Licentiæ gradus conferat, ac singuli ipsius stu-
dii Magistri, sive Doctores in facultatibus, in
quibus ibidem rexerunt aliis cum rigore exa-
minis Licentiatis quibuscumque Magisterii, sive
Doctoratus insignia de consilio, & assensu alio-
rum Doctorum, sive Magistrorum præfatae facul-
tatis inibi impendere, sive dare valeant, & ex
tunc illi, qui insignia hujusmodi receperint, li-
centiam habeant tam in prædicto, quam ubi-
que terrarum quocumque alio studio, absque
alio examine, aut approbatione legendi, do-

cendi, & cætera faciendi, quæ Magistri, & Doctores, in altero didorum studiorum facere possunt, ac quod ipse Cancellarius, seu Vicarius, & qui pro tempore Rector ipsius Studii fuerit: & Doctores inibi residentes vocatis secum in competenti numero, prout eis videbitur, de qualibet facultate aliquibus Licentiatis, & Scholaribus providis dicti studii Nannetensis, ac duobus ad minus de Ducis Britanniae pro tempore existentis Consiliariis, pro felici directione dicti studii salubria statuta, & ordinationes concedere possint. Super quibus omnibus, & singulis auctoritate Apostolica, & ex certa scientia facultatem, & etiam potestatem concedimus per præsentem. Præterea omnibus, & singulis Magistris, Doctoribus, Licentiatis, Scholaribus, & Studentibus, ac studere volentibus, licentiam elargimur ad ipsam Civitatem Nannetensem accedendi, & inibi legendi, docendi, & studendi, ac gradus, & insignia huiusmodi modis præmissis recipiendi, & impendendi, nec non ipsis pro tempore regentibus, vel studentibus; & qui gradus vel insignia huiusmodi receperint. Quod ipsi omnes, & singuli, omnibus, & singulis prærogativis, privilegiis, præminentis, antelationibus, libertatibus, exemptionibus, immunitatibus, honoribus, & indultis per nos, & Prædecessores nostros Romanos Pontifices, & alii quavis Apostolica Ecclesiastica, vel mundana auctoritate, sive potestate quovis modo concessis, & ab eis emanatis. Quorum omnium, & hac de super confectarum litterarum, & inde sequentorum quorumcumque formas, continentias, & tenores, ac si de illis, & eorum singulis specialis specifica, & expressa mentio, & designatio, nec non tenorum eorumdem de verbo ad verbum insertio facta foret, præsentibus haberi volumus pro expressis quibus Parisiensis, Bononiensis, & Andegavensis generalium studiorum Universitates, ac in eis graduati Scholares, & Studentes uti, frui, & gaudere possunt, & poterunt quomodolibet uti, frui, & gaudere possint, valeant, & debeant, seque illis defendere possint, valeant, & debeant pariformiter, & absque ulla differentia perinde in omnibus, & per omnia, ac si illæ prærogativæ, privilegia, præminentis, antelationes, voluntates indulta, libertates, exemptiones, immunitates, honores, & concessionem ipsi studio Nannetensi, ac in eo legentibus, & studentibus, & graduatis Scholaribus, & suppositis specialiter, & expressè concessa forent, & in eorum favorem emanassent: Et insuper, & eo ferventius ipsi Magistri, Doctores, & Studentes in dicto Nannetensi studio erga studia valeant infudare quo adversus eorum turbatores vivacis protectoris suffragio cognoverint se munitos moderno, & qui pro tempore fuerit Episcopo Nannetensi præfato per Apostolica scripta committimus, & mandamus, quatenus prædictis Magistris, Doctoribus, Scholaribus dicti Studii Nannetensis, & in illo graduatis efficacia defensionis, protectionis auxilio, & præsidio existens, per se, vel alium, seu alios faciat, eosdem Magistros, Doctores, Graduatos, Scholares, & Studentes, præmissis prærogativis, privilegiis, præminentis, antelationibus, voluntatibus, concessionibus, honoribus, & indultis pacificè, & quietè uti, frui, & gaudere. Nec permittat illos contra ea & præsentium nostrarum litterarum continentiam, & tenorem, vel alias à quoquam quavis auctoritate, etiam regali, aut Archiepiscopali, vel alia Ecclesiastica, vel mundana perfulgeat dignitate, impeti, seu etiam indebitè molestari, contra-

dictores quoslibet, & rebelles per censuras Ecclesiasticas, & alia juris remedia quibuslibet appellationibus postpositis compescendo, invocato ad hoc si opus fuerit auxilio brachii secularis, non obstantibus felicis recordationis Bonifacii Papæ Octavi Prædecessoris nostri, illa præsertim, quæ cavetur, ne quis extra suam Civitatem, vel Dioecesim nisi in certis exceptis casibus, & in illis ultra unam dietam à fine suæ Dioecesis ad Judicium evocetur, sive ne Judices à sede Apostolica deputati extra Civitatem, & Dioecesim, in quibus fuerint deputati contra quoscumque procedere, aut alii, vel alii vires suas committere, seu aliquos extra suam Civitatem, & Dioecesim, in quibus fuerint deputati, contra quoscumque procedere, aut alii, vel alii vires suas committere, seu aliquem extra suam Civitatem & Dioecesim evocare præsumant, & de duabus dietis in Concilio generali edita, ac aliis constitutionibus, & ordinationibus Apostolicis, aut si aliquibus communiter, vel divisim à dicta sic sede indultum, quod interdicti, suspendi, vel excommunicari, seu quod studia generalia nisi ab aliis studiis similibus ad certam locorum distantiam remotis locis, erigi non possint per litteras Apostolicas non facientes plenam, & expressam, ac de verbo ad verbum de indulto huiusmodi mentionem. Ac aliis privilegiis quibuscumque quibusvis aliis generalibus studiis concessis, & eorum statutis, & consuetudinibus &c. juramento, & Apostolica auctoritate roboratis illis præsertim, quibus forsitan in eisdem studentes, sive Licentiati, quod alibi ratione Studii non resideant, vel gradum, sive insignia non recipient ante dicta Jurejurandi Religione affirmari distinguantur; quæ quidem juramenta hæcenus præstita duntaxat penitus tollimus, & ad illorum observationem non teneri auctoritate, & scientia similibus decernimus, ac ipsa juramenta habemus, & haberi volumus pro infectis, cæterisque contrariis quibuscumque.

Nulli ergo omnino hominum liceat hanc paginam nostrorum statuti, ordinationis, concessionis, commissionis, mandati, Constitutionis, & voluntatis infringere, vel ei ausu temerario contraire; Si quis autem hoc attentare præsumperit, indignationem omnipotentis Dei, ac Beatorum Petri, & Pauli Apostolorum eius se noverit incursum.

Datum Senis anno Incarnationis Dominicæ millesimo quadringentesimo sexagesimo pridie nonas Aprilis, Pontificatus nostri anno secundo, D. de Piscia.

PAULUS SECUNDUS.

PONTIFEX CCXV.

ANNO DOMINI MCDLXIV.

Paulus Venetus prius Petrus Barbus Eugenii IV. nepos, Pio II. successit anno 1464. Cardinales purpura donavit. Jubilæum ad annum 25. contraxit. Obiit (quæ morte incertum) anno 1471. ætatis 53. (*Magni Bullarii Romani Tom. I. hujus Editionis Luxemb. 1727. fol. 380. App.*)